

取

隅

集

嫩隅集卷五

上海 趙文哲 損

瘦馬行

馬爲明制軍所贈余隨征旣出萬仞關所備副  
馬皆追不及此馬備歷艱險直抵老官屯卒賴  
以濟比其歸精已銷亡矣爰命閩人謹飼秣以  
終其年並賦詩旌之

我馬黑質白作章瘦至見骨骨轉強三千餘里四閱月  
爾生我生我敢忘嗚呼我馬瘦有以人不自肥畜何望  
軍興五年蓋藏盡百錢束草千斗糴師期未及困旅食

艱難我共馬備嘗其秋王師遂采入西拊賊背東扼吭  
我屬丞相究西略萬古未闢蠶叢荒盤根如繩繩作網  
碎石如刃刃有鋒走丸之坂泥滑滑積齒之壑波汪汪  
軍中雲錦六萬匹太半寶勒兼絲纒平時伏櫪飽芻飯  
腸肥腦滿氣蹶張初程夷坦善控送馬步工與人輝光  
外疆中乾古所歎入險駭汗流翻漿或踣而卧卧猶喘  
或痿而走走且僵或僨而奔奔轉怒卒然而病死道旁  
中途失馬競匍匐空餘鞭策資扶將嗚呼士不臨難節  
不見至此始信我馬良我馬有德復有力注坡驀澗如  
風檣萬人指點詫神駿夕刷昧谷朝搏桑豈知馬亦臨

事懼不輕進乃無夷傷憶昨金江水暴漲獬怪雨排  
雷礮因人作計太弄鹵竟思犯黑一葦杭二僕四馬先  
我渡未到彼岸淪胥亡斯時我馬出神勇撒波一躍蛟  
龍翔于林得之慙更喜馬不我咎悲鳴長瘴鄉水毒草  
似棘經旬不食百鍊剛一時瘦馬名大振紫瞳赭汗紛  
形相當其混迹誰一顧正坐未飾千金裝所惜我馬事  
非主徒搦弱管叅戎行不然彎弧橫劒大殺賊草頭一  
點鷹飛揚回視凡馬真羣羊歸來縱使血裏創黃金寫  
汝陳帝閭嗚呼孰謂我馬思戰場嗚呼孰謂我馬愁戰  
場

贈博晰齋觀察卽題水石清娛畫卷

憶余始通籍君時在詞垣琢削魯璠璣佩紉楚蘭蓀  
天子重循吏疇咨畀大藩粵西接滇南軍興正紛繁君  
乃得平調萬里移朱轡朝蒞夕報擢持觴綏元元我方  
承薄譴羈栖閱寒暄天涯一握手風誼夙所敦洎從戰  
場返相看幸生存悽惻翦燈語漂泊翦紙魂經年瘴癘  
身得君比靈護按部列歌板分曹羅酒樽爲歡亦已極  
時復陳高言叔寶談輒倒孝先腹堪捫詩隨得草堂賦  
心溯文園官曾列侍從人本稱王孫家庥與國故一一  
探本原細如繭絲吐熟如餅水翻愧我舊學荒訓答連

晨昏如持賣餠簫往和嶰谷管如扳射鴨弓來競百石  
磬示我行看子玉貌何溫溫林颺遠偏激瀑雪寒不喧  
翛然葛衣畔秋氣來無痕讀画尙神往何況真邱樊北  
轅我偶遂未返江南邨公歸倘得請野鷗逐班鷄京西  
好泉石可以游輕軒願從卜小築使窺述作門唐德一  
經備漢道三史尊有志我未逮茲事當推袁升沈及聚  
散區區安足論

贈歌者楊暹

定場絃索悄無聲纔到尊前態已生不是當年周小史  
誰將初日寓芳名

小拍紅牙夜未停月將斜處酒翻醒青衫自有天涯淚  
不爲琵琶隔座聽

左驥史炳悵同時費盡繁欽絕妙辭陌上玉驄留不佳  
東風眞負小楊枝

相逢疑在鄂君船簾影盃浪摠可憐畫燭雙花忽墜淚  
歡筵無那卽離筵

酒淺香寒夜不勝屏山一曲路千層他時誰咏輕紅袴  
身是踈狂老季鷹

阿蘊曲

元至正中梁王以宗室鎮善闡時大理段功繼

爲總管會明玉珍寇雲南梁王奔威楚功帥師  
來援屢挫玉珍之衆玉珍母自蜀寄軍中書勅  
玉珍必得雲南功偵得其書使員外郎楊淵海  
更其詞令玉珍速歸玉珍遂遁梁王德功甚以  
女阿禧妻之功留居善闢其夫人高氏寄樂府  
一章促功歸有蜀錦半閑鴛鴦獨宿之句功乃  
返大理旣而復往有譖於梁王者王密召阿禧  
授以孔雀膽令毒功且命之曰猶有他平章不  
失富貴也阿禧潛然受命夜寂以情告功願與  
功西歸功曰我有功爾家我趾蹶爾父爲我裹



之爾何爲此言三諫終不聽明日梁王邀功東  
寺演梵至通濟橋馬逸使蕃將格殺之阿瞿聞  
變欲自盡梁王百計防衛瞿終賦詩愁憤而死

詩曰吾家住在雁門深一片閑雲到滇海心懸  
明月照青天青天不語今三載欲隨明月到蒼  
山誤我一生踏裏彩吐嚕吐嚕段阿奴施宗施  
秀同奴及雲片波潸不見人押不蘆花顏色改  
肉屏獨坐細思量西山鐵立風蕭灑踏裏彩錦  
被名吐嚕可惜也反我也押不蘆北方起死回  
生草名肉屏駱駝背也  
鐵立松林也皆夷語功有子寶女羗奴羗奴

亦能詩將適建昌阿黎氏以繡旗遺寶曰我從  
束髮聞母稱父冤恨非男子不能報今歸夫家  
收拾東兵飛檄西洱汝急應兵會善關此旗所

以識也及寶爲總管明玉珍復侵善闡梁王遣  
使乞師寶絕之聞明祖定金陵遣使歸款寶卒  
弟世權國事潁川侯傅友德征雲南世馳書請  
依唐宋故事傳辱其使進兵擒世

善闡傳分土昆明肄習流爭見南夷歸版籍驟聞西寇  
擁戈矛段家金戟開鴻業封秩摩訶凡幾葉官守祇承  
勢尙雄隣言罷責情方洽報道宗藩久被圍平章慷慨  
賦無衣宋城將爲炊骸破蜀將翻綠寄藥歸碧雞金馬  
森相峙鐘虞依然功莫比授館猶遲返葉榆射屏早從  
歌穠李五華樓畔啓鸞局七寶車前引鳳鳴玉簫吹處

人如玉團扇還愁畫不成有人尺素傳魚腹池上鴛鴦  
悲獨宿故劍難忘舊日情大刀好籍新詞卜旌旆迢迢  
抱珥河波潏雲片奈愁何驚鱗遠逝偏貧餌逸翮迴翔  
竟拚羅由來禍福相更迭謗滿中山冤孰雪不念今宵  
賜酖人當年親裹創痕血可憐竊窕膝前妹頃刻愁腸  
轉轆轤此語真教啣石闕此身寧忍見金夫由房切切  
聞私語間道忽忽盡歸去想像羅牕燭未殘箜篌彈斷  
公無渡明日招邀東寺東畫橋幾曲控花驄誰知旛影  
經聲裏一片陰風哭鬼雄香閨倉卒躬難代泉路渺茫  
言肯背岐舌應漁雍糾妻湛身願作孫權妹魂返難尋

押不蘆生還望斷錦怯苴素馨如雪銀梭路游女猶歌  
緩緩無興亡回首同朝暮魚腸已出梁王墓華岫空傳  
避暑時菜坪誰問嬉春處曾誦羌奴七字詩復仇心事  
凜須眉巫歆播後江山改定有遺民望繡旗

題楊升菴先生曳杖遺像

像在大理感通寺寺卽先生寫韻樓遺蹟庚寅  
春杪余自永昌北還過龍尾關去寺尙三十里  
太和令屠君可堂攜像至驛舍屬題走筆書此  
絕徼斯文感在茲蒼山洱海凜鬚眉眞從曳杖行吟地  
想見排闥慟哭時張叔詎傳封禪作虞翻空抱首邱思

高樓寫韻人如昨腸斷天涯錦字詩

明中丞招游近華浦卽席有作

柳陰陰處帛闌船偶遣閑身到酒邊水曲園林當首夏  
天涯絲竹逼中年客緣多病風懷減人爲休兵笑語闌  
磨盾歸來餘禿管南塘重賦杜陵篇

優曇花歌爲大宗伯雲巖先生賦

盲風瘴雨矢石林從公兩載生道心一言以蔽吾無隱  
不待木樨香滿岑歸旌偶駐昆池畔經卷爐熏日清晏  
膽餅分得優鉢曇小結圓跏叅鼻觀此花示現寧有期  
旃檀爲骨蓮爲肌譬諸古德偶出世聞者歡喜矧見之

官齋似水澹凝佇欲覓幽芬在何所聞思悟處不可名  
檻外鸚哥亦無語鬢雲初靄甘露垂靈根無根非折枝  
漫言一勺功德水兵火劫後春田滋浮生如我苦淹泊  
丈室相依比行脚他時受記一破顏衣上天花散還落  
昆明午日雲巖先生以詩招飲卽次元韻

愁如絲糲巧迴縈詩逐檐花斷續鳴沒擬舉杯陪僕射  
應憐吹蓬有門生關心節物頻懷舊回首年時正論兵  
今日從容觀嬰圃森嚴猶識亞夫營

是日令諸材官  
校射並宴犒之

近於家書中得馮貽曾寄詩有虛疑海外失東坡  
之句蓋去秋予隨征出關都下久不得消息人傳

爲已死也燈下檢閱不勝感嘆賦此寄示兒子秉  
淵並以答貽曾之意仍次午日詩韵

家書重檢淚猶縈轉轆迴腸夜自鳴眞說子瞻瓊海死  
偶隨定遠玉關生栖遲已掃緡經室

近敬書金剛經將畢

衰老將

成脫籍兵尙有耦耕心事在菟裘隨分不須營

### 黑龍潭觀魚

陟山於郡爲枕屏東迤獨屬凡幾陘有峰翼如翠鸞停  
磐石久勒新宮銘玉桃入夢誰與齡鶴歸自蛻千年餽

潭爲銀陵河之源其上有龍泉觀明邵眞人修我出北  
眞處邵之母夢玉桃而生見商文懿所撰碑記

門遶近垌銀陵河水清於涇其源甯沸若在劍側沈正

檻徵葩經震鱗潛焉省兮冥一勺功德藏八溟重淵之  
府無戶庭綠沈沈處通璇局浮波何人識蜿蜒有堂堂  
者形其形九衢開闔紛靡萍曉日倒射玻璃餅若游于  
空影瓏玲親人似解朱弦聆餌之搖尾去遠汀知爾不  
受刀砮刑昨宵春田甘澍零幾千萬落排高飭朝看新  
秧插釵葶已卜秋至無炎螟得非昭昭馨德馨雨工鞭  
撻煩媼姪爾亦揚髻乘晦暝雲垂海立驅輕霆竭來晏  
坐池上亭纖塵不動何淵渟潭煙一絲倏裊青餘波呀  
呶噓微腥蘋風四來扇泠泠斯魚之樂龍之靈臨流忽  
思酌湘醺此中燐血飛碧螢魚如有知敬而聽曷不往



滕諸娉婷

渾爲明季郡人薛大觀攜妻子及女夢雲靜玉婢蘭馨殉節處

### 蓮房八韻

憐爾嬌能語重重護翠房深知含惹苦驟恐褪衣涼菽  
發微舒紫鞋揚乍卸黃芙蓉圓深裏穀瓜小細分瓢的皦  
虛還受玲瓏巧自藏通根波益潤透葉露生香鏤拱垂  
偏似纍臺穩不妨問誰吟墜粉杜老最清狂

### 重赴永昌作

戍旗斜捲角無聲瘴雨蠻烟復此行誰料傳書羈屬國  
終知振旅仗營平身如風鶴飛頻還心似泥蛙怒乍盈  
爲語田夫莫驚問黃梅時節要深耕

天威逕歌

大理龍尾關以西抵永平三百餘里石徑崎嶇  
相傳爲武侯師行所經志乘所謂天威逕也  
癸寅夏五再赴永昌過此有感而作

蒼山如龍尾連首兩關勢扼峰十九蜿蜒一逕走博南  
何似褒斜谷之口誰將此逕錫嘉名丞相天威今不朽  
南人從此不復反青史書之炳星斗堂堂拜表大討曹  
內患先除腋與肘師還猶未及瓜期垓蟻屯蜂旋紛糾  
馬忠張嶷前後載徂征僅使邊黎有耘耨小儒於此輒  
獻疑所好旣私訾亦苟謂公將略或非優斯語本從晉

人受吁嗟論古亦大難其地其人必親剖當時四郡悉  
蕩平餘力猶能掃羣醜申明漢法置漢官役屬諸蠻隨  
指嗾胡爲率職盡豪酋桀桀驕驕擢維莠坐貽不靖歷  
歲年母乃粗安一時狂豈知公獨見其大戎索寧堪比  
郊藪烏龍頰木非人居青草交頭瘴多母古稱百濮厥  
種殊兎狡狼貪瘵者狗不臣不享聖有訓被以衣冠如  
械杻七禽七縱信有諸以兵爲戲我無取惟公上策在  
攻心以夷治夷挈綱紐不勞將士枕戈甲不苦丁男輓  
儲糗譬諸鹿斯競走險縱之於林反相友亦知野性終  
難馴守土者能備干揆天教炎鼎限三分公不愍遺作

耆耄不然北伐定中原  
齏茲小夷魚在笱雅陳  
六月出周師書紀七旬  
格虞后叛則討之服赦  
之么靡何煩記誰某我  
聞有道四夷守疆場之  
事國恒有偶然反側詎  
病公諸葛大名播童叟  
天風出穴激箭飛點蒼山有風孔故大理多  
風海水注谿作雷吼大  
旗不捲馬蕭蕭兩佛神  
靈來左右手把吳鉤一  
放歌倘采朱轡奏矇眵

重過高黎貢山

萬峯如海潮勢涌一峯  
出下有崇朝雲上無太  
古日霜雪所不到陰氣  
彌蕩泆蒸爲霧冥冥朱  
碧眩無質雷崩石壓頂  
雨攪淖沒膝老樹藤蔓  
纏受困如拳桎極杪多

寄生怪醜難致詰非時發狂花隨地隕殘實毒瘴之所  
滋欲採心已慄餘生我偶然安往敢求逸此山凡五經  
涉夏亦非一去年以四月過此豈知寒暑互熾熾載栗栗搜篋  
存敝裘尙穴戰場蝨岐塗車未迴折坂馭頻叱勞譌寧  
自陳念彼戊關卒

春杪予北還行次昆明值李隨軒水部視學來滇  
晨夕過從悲歡並集未幾李按部激江而予亦以  
事復返騰越雨夜不寐偶成奉懷二章却寄卽次  
李過楚南寄宋小巖太守詩韻

君來正我卜歸時別苦匆匆又苦遲歲厄自憐偏遇閏

路遙誰遣更逢岐聞絲謝傅中年恨罷酒嘉王半夜悲  
等是天涯不相見何如京雒寄相思

牕燈帶雨暈微青喔喔荒雞唱未停病骨漸蘇秋早覺  
夢魂頻警曉猶醒閑身濩落如剖瓠浪迹漂流不繫萍

別後薊門書至否更無人與話趨庭

君至滇時爲述兒  
子秉淵近狀甚悉

近予不得家書  
者已判年矣

閏午日余元亭別駕招飲作

身似黃楊閏又遭相逢聊共引芳醪眞忘佳節還重午  
剩有悲歌當續騷伏雨闌風歸未得香羅細葛  
賜曾叨愁看彩糴殘絲在燭下飄蕭耿二毛

積雨初霽戲東充齋觀察

青苔被楊薛搖墻片段雲歸漏夕陽著屐衝泥人咫尺  
典裘貰酒興尋常交深舊雨非今雨客久他鄉是故鄉  
好語北門窮塞主檐聲昨夜悞糟牀

和隨軒二詩意有未盡再次前韻

傾蓋漳南話別時鞭絲帽影雨逶遲妻孥異日憑朱季  
衰病他鄉念趙岐馬首欲西猶有戀雁聲辭北故含悲  
分明一幅河梁畫人在天涯費夢思

天涯難忘是秦青一曲歌遯十月停月最圓時人未散  
燭將殘處酒偏醒輕泥南陌初沾絮新水東風竟化萍

贏得白頭吟望苦霧花雨葉對空庭

充齋辱示和章再次前韻

濁酒多君屢過尋尊前愁鬢感河陽試論懷抱知猶昔  
每話眠餐視勝常咏作洛生聊避俗吟成越客苦思鄉  
八千里外從軍樂許並三年聽雨牀

寄宋小巖衡州三疊前韻

裨春猶記券驢時未惜歸程十日遲擬買湘江蒲一幅  
聽歌楚曉麥雙岐力環有約期偏錯石闕常卬語自悲  
身滯瘴雲最深處莫將今我盼來思

詩句惟餘蠻語在行蹤真似賈胡停道旁鬼自工相侮



澤畔人原畏獨醒故國風流懷白苧窮邊意氣托青萍  
幾年芸館同簪筆草檄親來問不庭

和雲巖先生雨後書懷見示之作卽次原韻

唾壺談麈被阿錫幕府清嚴亞夫壁偶盤駿馬挽雕弓  
一手能生雙霹靂軍中好整夜好暇不覺流光箭同激  
瘴鄉入夏每愁霖天漏沈沈幾重幕今年旣雨晴更佳  
露井風檐氣清寂虛窓倚幌見螢流暗牖藏燈任蛾覓  
依然人在受降城一曲梅花聽吹笛先生籌筆向戌夜  
對景無端予心戚昨聞京圻頗顛旱璧牲禮徧山川滌  
麥秋已過黍方華麤飯殘年須飽喫北門吾尙不憂貧

王事知公甘我適防秋正調八關兵屈指師期火朝覲  
尊前偶乏刺閨書閑數銅籤傍階滴南樓涼月興何如  
清嘯一聲曾却敵

放言一篇再疊前韻呈雲巖先生

蟻封何物膺九錫蝸角有時破十壁浮盃水欲傲滄溟  
敗鼓音思掩霹靂土龍行雨鞭安施木雁凌風機所激  
羣游擾攘蝨在禪宴處啁啾燕依幕鏡懸暗室混妍媸  
鐘設萼鄉泯誼寂醉裏驚蛇影易留夢中藏鹿踪難覓  
邪蒿未必盡勝梁爨竹何曾皆中笛早聞抨雀走珠丸  
頻訝割雞揮玉戚鶴頸雖長豈用裁鷺毛自潔寧煩滌

丹霞曳佩手誰縫白石療飢煮孰喫絲纏蠶老究何爲  
紙破蠅飛亦焉適肺肝吳越詎相知眉睫邱山莫予覩  
不求道術証九還不向禪宗分一滴放筆聊成天問篇  
知公轉語鋒無敵

述莽見和前篇三疊韻酬之

餘年帝自戰場錫客裡如家徒四壁放言直欲惱天公  
白晝無雲飛霹靂君眞健者色不變相和歌成轉酸激  
是時雨過晚涼生沈李浮瓜捲絺羅池螢翳葉闔復開  
砌蛩依苔喧更寂一燈初翦話前游如夢如塵杳難覓  
前游何處最堪思半在青溪共邀笛應劉鄴下本齊名

王謝江東兼密戚清狂往往典鸛裘愛看當壚器親滌  
十年宰相匪思存煨芋甘推懶殘喫一從薄宦致差跌  
謂北其轅反南適入門竈煬問空勤棄婦何曾經廟覲  
井桐昨夜報新秋月溢方諸淚雙滴忽憶年時走瘴江  
一千里不見一敵

充齋以和章東示四疊前韻

吟筒入手百朋錫快似旗亭爭畫壁賞花在昔笑徘徊  
擊鉢吾今窮霹靂公然樓伐勢不支碎爾窮追變反激  
枯腸隱隱轉車輪駭汗徐徐拭巾冪是時殘蠟對飄搖  
此地酸醬伴岑寂思當將斷逕忽通句到初圓力難覓

遂令疏越清廟絃却儼蕭寥釣船笛年來踪跡判升沈  
老去情懷共欣戚鄉關何事苦思量兵甲幾時真洗滌  
余髮種種愁頻搔臣口期期恨如喫用鄧艾口吃事借作喫但求  
飲酒千日醉誰遣春糧萬里適路雙岐處我未迴垣一  
方間人莫覲罪言不緣鞞鐸發血淚寧爲琵琶滴小詩  
角鬥何足道毒手老拳詫相敵

擬宮怨五疊前韻

芳名憶自茗華錫朶殿春風扇椒壁門前不洒竹枝鹽  
日日宮車馳霹靂爲誦周南第一篇據魯詩說脫簪待罪詞  
偏激君王不念有齋女入廟曾尸六尊羅紈扇先秋忍

棄捐銀壺永夜聽悽寂可憐庭樹影朦朧夕陽惟有寒  
鴉覓却望昭陽火照筵有人醉弄寧王笛瓊枝壁月奉  
宸歡粉碓脂田軍外戚自搜蓋篋賜衣存零落蛛埃難  
澣滌閑愛鸚哥解誦經朝朝紅豆親調喫深知永巷亦  
君恩敢向僊家怨淪適餘生輸與帳中人珊珊猶望翩  
來覲長門買賦少黃金親拂瑤牋注銅滴他時一鑑倘  
重陳曾料莫敖必輕敵

充齋枉顧復出一章見贈六疊前韻奉酬兼謝其  
頻致佳酒

飛將軍號君執錫一幟翩然馳趙壁我時堅卧若弗聞

大似嬰兒對霹靂平生萬事甘讓人詩句新來洗豪激  
聲如土鼓不成摻質比匏樽豈須幕偶然拈韻佇興成  
時鳥候蟲共喧寂無人愛處君獨賞纔放晨衙走相覓  
瘴鄉流宕兩人慣揮淚非因轅寄笛上冬憶我戰場回  
虞陛初傳舞干戚蠻邦筐篚何足陳蒨屋瘡痍要親滌  
逢君把酒語慨慷未藉此官一生喫一篇臣結春陵行  
俗吏聞之驚適適文章風義君能兼寢饋應知古人覲  
獨慙我與世相遺日向牀頭丐餘滴肺腑連宵芒角生  
醉衝愁陣無堅敵

寓齋卽事柬述菴七疊前韻

圓跣無蒲手無錫結夏何如僧面壁平生但蓄無絃琴  
不愛奇聲傳霹靂官齋清絕清似水一刺不通非有激  
林颺吹鬢涼絲絲花霧侵衣陰冪冪檐端雙鵲曉聲乾  
簾外一鳩午語寂蒼苔雨後三逕封除却羊求蹤孰覓  
人到中年感易生酒壚豈爲隣家笛故園昨寄萬里書  
情話依然共覲威青衫只道淚痕多戰血那知今未滌  
多謝加餐勸我勤惠州飯許東坡喫華胥聞說勝釣天  
假道應從醉鄉適九衢處處有堯樽酒德誰能使民覲  
莊子民可使覲德不可使覲形比來曹事都不知挂頰西山秋欲滴相  
將料理苦吟身縛袴橫刀再臨敵



寄博斯齋八疊前韻

英簫函從香案錫誰遣衝炎走銅壁瘴雲如墨雨如漿

夜夜馬蹄生霹靂歸來遇我騰衝城却怪北山詩太激

人將白髮自蕭散雨過黃梅轉蒙濛不辭著屐來取別

書借一紙供破寂

予在騰越值博斯齋自塞上回瀕行贈我書數十冊

去歲征南

幕府開參軍在座君能覓玉門生入事如夢軟脚筵開

聞箏笛聽到陽關第四聲年少何堪也悽戚

博斯齋有歌者朱琇色

雲冠一時予于永昌屢見之近已攜歸大理矣

天涯去住總難料未許征衣塵

土滌杜陵依舊客諸侯對酒真憐不能喫

杜詩對酒君不能喫

今且看點蒼山試茗分香興清適畫欄桂樹又秋風花

下何人展嘉覲玲瓏休唱樂天詩  
燭淚還愁替人滴借問維摩病若何  
定知談笑熊羆敵

助齋傳  
病初起

述菴以夏秋屢病一章索和卽次元韻

戰場骸骨從天乞  
慧命寧緣百憂訖  
維摩之疾示何因  
已逮烹葵始食鬱  
與君結束事鞍馬  
南下朱波北突厥  
可惜平生消瘦衣  
年年在筇梅霖黦  
比來作客不稱意  
有指無名久甘屈  
心作懸旌風易搖  
胸成廢井泉難掘  
支離身亦苦多病  
一卷楞嚴思佞佛  
客來座上羅方書  
貧至囊中罄藥物  
奚童好事昨語我  
呂凱宅邊水可祓  
去永昌三十里  
金雞邨有溫  
蠲煩起痼真有神  
快比長  
泉甚佳邨卽後漢呂凱故居

鏡除道茀暗汝所言何太癡桃源尙有人歌緯不如閉  
戶心太平勞者偏宜小休汜入秋山色濃黛掃向晚雲  
光薄羅熨相將何異挂單僧行脚猶嫌剩瓶拂前盟香  
火吾忍寒第一先忘佩與綬謝公小極亦復佳鏡裏霜  
絲笑堪髴回車頻遇阮路岐舉扇豈遮庾塵拂蕤滑鱸  
香空爾思念念十載秋風歟書生戎幕氣轉豪肯學諸  
軍衣繡襦吁嗟劇孟彼何人猶勝勇夫排佗佗據鞍對  
草嚇蠻書秃筆鋒如寶刀剗一尊往往共愁語敢擬齊  
嬰從晉舛和歌聊引七發篇一曲休教玉音調

予與充齋旣和述菴乞字韻詩翼日述菴復出一

章見示且云此後當以一九泥封函谷任公等濟  
河焚舟矣是直謂我不能更借一戰也再以此詩

挑之並邀充齋同作

少年詩句雞林乞

予昔在吳中與述菴及王光祿禮堂  
吳舍人竹嶼黃學博星槎錢學士辛

相曹編修習菴結吟社沈宗伯歸愚先生序而刻之詩  
皆少作今已大半焚棄然當時曾流傳至日本其國相

高

乞示詩文之法宗伯欲以上  
賦贈七言律人一章從賈船郵寄且上書宗伯

聞後答其書爲當  
事所忌遂不果

垂老行蹤朔南訖短衣匹馬走從軍

萬里風雲助盤鬱恥居王後吾何敢和璧豈堪終配厥

偶因倚醉鬥新篇十樣蠻牋酒痕黥音兼山水賞惟鍾

味別酸鹹嗜逾屈君才如潮日再至注海非關禹功掘

又如七寶現樓臺一彈指頃遍吾佛公然示衆復示威  
欲刳羣侯受方物敦盤自昔狎齊盟不念壇壝共齋禩  
函谷丸泥縱已封仰攻且挽臨衝第與君論交自弱冠  
薄宦曾同典

丹絳感時詎識翰音登濟險反輸狐尾沱人情冷煖心  
自知如冰在壺火在爨眼前萬事安足道似雪吳鉤夜  
頻拂唱酬近愛競病歌差謂兜牟勝簪紱婦人醉酒病  
未能佳趣于斯得髣髴長安同學早致身比日星軺耀  
埃埽不妨高適歎悠悠漫效王忱喚歛歛素心况復得  
錢子昕夕招要聯襟裾仲宣平時體少弱纔搦柔毫壯

且佗捕狸却致天馬徠綴履偏持莫邪刺用說苑語獨憐蠻

鄉逐臭多纓蕙紉椒空咲舛甘泉賦薝咲舛以棍批兮知君力可敵

二豪悉索不愁左右訕

柳塘集卷五

巳酉四月二十有  
二日男秉淵禁校

姬隅集卷六

上海 趙文哲 損之

七夕招明碧夢王述菴小集卽席次碧夢韻

天涯同是劫餘身清淺銀灣未起塵  
隔歲雙星空誓願  
入秋初月已精神  
蠻童笑問知蓮節  
永日人不知  
七夕爲佳節  
旅席  
驚看試橘春料得長安小兒女  
堆盤瓜果詎征人

碧夢去後再次前韻戲柬

風尖月細趁吟身如水官齋隔市塵  
老去評量絲竹肉  
客來贈答影形神  
燈分夜色渾忘曙  
酒洗秋懷別是春  
莫訝玉驄嘶不住香熏翠被待歸人



次雲巖先生卽事原韻

晚雲挾雨起如樓座有清尊任拍浮白髮半頭猶健在  
青山滿眼當去歸休銀箏獨許桓伊撫金鑰常因杜牧  
留誰信弓刀紛似雪一燈清話小窻幽

題新遷窩齋壁再次前韻

因山爲屋似層樓山上飛泉屋下浮自脫朝班容一臥  
眞將傳舍署三休短筇每爲看雲拄殘燭常緣聽雨留  
蔣逕新來苔不掃卜居吾最愛遷幽

過法明寺三疊前韻

碧樹層層隱寺樓粥魚茶板白雲浮懶叅客至晨常放

乞食僧歸夏自休安道楞伽空省記子瞻嘉祐暫淹留  
木樨滿院香聞未坐愛西巖落日幽

雨後充齋招同述菴碧夢過易羅池小飲卽席次  
碧夢韻

客遊無處不隨緣一雨秋光一倍鮮樹截遙山遲上月  
蘋搖空水細生煙劇憐絕徼聞歌地賜好新涼被酒天  
漫向迴汀倚雙槳夜深鷗夢正脩然

次雲巖先生感懷用東坡寄鼂美叔詩韻

蒼松棟隆材歲寒始知賢亦有山中櫟思以不材全偶  
然托餘蔭兔絲忍相捐物情亮如此我將卜諸天自持

征南節邦人喜逢年司馬未入相婦孺空喧傳  
禪悅厨傳屏肥鮮誰知居士身曾經畫凌烟我本吳下  
蒙齒牙借芳妍黜同馬一鳴懶過蠶三眠誦公穆如作  
萱蕪散幽煎世事但指口好詩漫便便易羅如習池水  
石餘清絲莫愁酒債積天帝倘貰錢

獨飲仍用前韻

端憂輒獨酌不復分聖賢譬諸墜車者不死其神全人  
生事如夢未醒疇能捐靈均強解事乃欲呼問天何如  
糟與醕盡此放逐年頗愛柴桑翁武陵亦虛傳悠然南  
山下采采籬菊鮮一樽竟醉矣何知突無烟飲酒與止

酒新詩自爭妍我非龐參軍相將北窓眠臣精久銷亡  
寧有膏自煎泥洹本一路修短隨所便華胥去非遠必  
從醉鄉緣此樂天付與豈資杖頭錢

永昌七月水僊花已開述菴有作三用前韻和之  
奚童競花供笑比博奕賢坐令十笏廬色香味能全水  
仙遺世質忿忿佩來捐翛然出冰雪瘴雲散炎天湘簾  
漾清影晝景遲如年相看憺無豫心知言莫傳南中花  
市盛四季粉紅鮮可憐桃李容變滅隨風烟惓茲凌波  
步姿制幽更妍引我逆鼻開伴我曲肱眠不敢携酒對  
苦薺手自煎依依歲寒心先時娛靜便梅兄山礬弟與

結物外緣養以黃磁斗聘以碧玉錢

次雲巖先生枕上偶成六絕句韻

山風吹雨入孤城鈴柝沈沈夜不驚  
一種情懷雨牀夢更無人處擁桃笙

經卷爐香現在因悠悠身世漫傷神  
索居何似長安路一雨都分舊與新

餅花淖汨見橫陳燈火新涼影獨親  
無限秋來別離感江淹賦裏第三人

天涯取次授寒衣隻雁雙魚信摠非  
却笑悲秋杜陵叟苦將年少論輕肥

人如牕蠟惟飄淚詩似堦蛩忽作聲聞道南中霜信晚  
不知先到鬢邊莖

捉席持裾兩載情圓頭真似說無生去年今夕人何處  
瘴雨連山匹馬行

秋日雜詩三十首

一臥空山桂樹叢天涯昨夜又秋風四愁客久辭機密  
九辨時方感厄窮怨鶴無聲悲斷角驚蛇有影駭懸弓  
征人莫訝歸心折倦馬蕭蕭亦欲東

牀頭手自拆泥封五岳難平一寸骨張纘偶辭殘客詣  
孫弘竟畏故人逢脫當緩急知誰望曾約瑕疵獨爾容

多謝西山青朶朶爲予拄頰十分濃

經旬徑絕足音登無僕當關仗小厖遠樹青連峯入郭  
踈花紅帶雨飄牕江鄉尙阻登樓粲伏臘空懷上冢龐  
誰料瘴雲深似海有人夢狎白鷗雙

雨堠風郵短策馳林宗宿處後來知井泉每讓人先汲  
竈火惟欣我獨炊醉卧尙賒壚女酒狂游偶乞去寺僧  
詩征衣如意珠何在不救窮途僕馬飢

昆明池畔戟成圍橫吹聲中換鐵衣竟入玉門望平不  
到競來金谷送將歸隔花簾幙歌音細臨水尊罍酒氣  
微豈獨舊人今尙憶秋風楊柳也依依

身是陳編老蠹魚，閑來偶借一瓊書。  
子才謨字思偏適，安世亡篇記漸疎。  
斑管豈堪供判牘，烏絲只合付抄胥。  
賦心盛覽能傳否？文似相如我不如。

勞生擾擾隙中駒，劒浙矛炊事有無。  
已悔虞翻三爵失，未愁何遠一縑輸。  
何人尙削東方牘，幾載曾吹北郭竽。  
西笑逌然聊復爾，漫將腐鼠嚇鵪雛。

入秋風雨軫鳴鷄，浮羽沈金物可齊。  
對客詎分牀上下，得朋還接屏東西。  
暫游汝社欣弦酌，久住巖城厭鼓鼙。  
落盡燭花猶軟語，酸蟻寒螿一時啼。

城僻如邨綠樹排，山泉流碧抱蕭齋。  
詩因乞酒連宵和



僕爲移花冒雨羞物貴固知居不易瘴輕且說住爲佳  
秋聲滿屋來何處一葉初聞打夜堦

卧聽飢禽啄木苔一尊犯卯玉山頽清如衛虎偏宜病  
狂到袁羊竟負才應候寒蟲同哽咽識途老馬獨徘徊  
從今不薄蒙莊叟笑口能教月五開

西曹且莫謫陳遵回首風波有幸民誰與舟旋寧作我  
自甘磬折不如人鶴知白露聲先警鷗戀滄江性轉馴  
損益讀來身世了豈徒能賤與能貧

蕭然候館感停雲一鏡秋絲不可耘西里方思從弟語  
北山久勒故人文床頭雄劍添新鏽篋裡生衣散舊熏

猶遺畫籌陪矍圃衰遲真媿魏叅軍

憶昨單車出國門結荷棧石積晨昏瀧頭吏慣嘲韓愈  
澤畔漁偏避屈原羸老自能安瘴癘獠奴漸解治蓰殄  
髡邊莫拔星星白萬一歸看竹馬孫

不信蓬萊水又乾醉看壺內走雙丸蜂癡只解鑽窗紙  
鼃樂惟知跳井榦顧我泥塗思曳尾何人台鼎對登翰  
如聞緱嶺吹笙夜天爲王喬下玉棺

堠火平安屬八關登臨聊復破愁顏風迴社鼓郊墟鬧  
日落牙旗幕府閑敢說民勞鳩在此差同吏隱蝨其間  
源明一事真堪恥兩載何曾識魯山

望鄉心共望京懸南北郵籤摠八千座右尙留知止訓  
盤中新寄曰歸篇道旁墮甌看何益井上居餅勉自全  
不作僧虔誇舊物推排已歷十餘年

居然長揖寄軍僑舊學踈蕪愧老韶久分守元常托落  
那知垂白轉漂搖讀書竟作亡羊牧詠事真成失鹿樵  
一自虛弦驚鍛羽望秋先已怯風颺

身似殘僧未打包行蹤何用卜瓊茅落花偶爾依籬角  
浮芥依然著屋坳有賦不求皇甫序無官那解子雲嘲  
近來多病蕭閑甚傳得方書手自抄

獨坐悲歌撫孟勞破牕風雨夜騷騷徒從元結求三益

久學劉伶謝二豪  
節物驚心逢說餅  
年時回首憶題糕  
時中秋前六日非值置閏在五月則今日已當去年重陽隨征至猛拱時矣  
一尊濁酒愁先

醉和淚還沾舊戰袍

書記翩然禮勿苛  
狂來拓戟舞傜傜  
人仍萬里逢秋老  
菊未重陽似雨多  
有客夜談當小極  
端居日飲更亡何  
謝公東府清游減  
孤負王郎一曲歌

高枕無須屏睡蛇  
楓林青鎖野人家  
幾年乞米停書帖  
比日支錢限畫叉  
山鬼有時臨幕竹  
水仙何事競秋花  
蠻鄉風景催歸夢  
不爲城頭噪亂鴉

揚水曾聞誦卒章  
次公無那醒而狂  
看成蒼狗浮雲散

唱到黃雞落日荒擬向中山常貰醉悔從陽里暫醫忘  
逢人只說居夷樂太保峯前客一房

一笑夔蛇本並行昭琴何必問虧成身緣積苦翻安隱  
心到能閑自太平偶逐伏滔同宴集未慚王勃壓才名  
孔賓頗憶窻前語山岳毛銖辨重輕

雲作重簷水作肩易羅池畔小茆亭文魚漾藻宵還見  
細馬穿花午自停客戀近游徧寂寞山橫秋影最玲竅  
歌聲忽掠迴波去一縷茶烟泊短舲

隻翼歸飛忽挂梢書空咄咄恨相仍五噫試問歌安適  
七發深知病未能化蠶翻憐膠網蜨爲鳩猶識掣韉鷹

從今買得絲千縷不繡平原繡信陵

折坂遲迴跨木牛失船偶藉一壺浮從人詫歎遼東豕  
有客猜疑海上鷗康樂未叅蓮社集安豐還厠竹林游  
平生却笑溫忠武動色名居第二流

悲秋客最怕登臨獨引清樽板閣深簾影爐烟常寂寂  
檐聲燭淚共潏潏狂來賀監還吳語病去莊生自越吟  
莫訝連宵人不寐一城鼙鼓萬家砧

蓼辛荼苦總能甘老去常思忍一慙曾次故應無宿物  
眼前誰與共深談敢知王肅三相反但道嵇康七不堪  
身落百蠻詞筆在年年搖落賦江潭

如聞集 卷六  
曳杖中宵繞步欄麗譙漏鼓聽三嚴北山誰說賢勞獨  
東閣吾欣吏隱兼杜牧有言原是罪王符著論合名潛  
平生枉佩金人誠醉膽輪囷筆又拈

漫郎迂叟署新銜不畏車弓有謗讒海上逢人知皂帽  
江邊送客感青衫卜居未決靈均策托命終期子美饒  
雜體江淹三十首吟成聊附玉魚緘

次雲巖先生燕射元韻

從容矍圃詎爲疲樂合騶虞早戒期天下惟公眞健者  
軍中凡事必先之彎弓未發人先伏激矢如飛鳥不知  
自笑陽元陪射耦深杯百罰復奚疑

雲巖先生復作一章見示再次前韻

排日詩逋力已疲吟筒又赴刺閨期汗流藉漉非虛耳  
笑遣羊何更和之候館居諸三篋在中年懷抱一樽知  
鋒車早晚歸裝促詹尹何勞就決疑

病中讀雲巖先生無題七絕句卽次元韻

茶聲藥影晝消磨爲誦新詩喚奈何何況水亭涼月夜  
一尊親聽舊人歌

清歌莫是定風波雲似輕綃水似羅看取茜紅衫子上  
淚痕應比酒痕多

元都觀裏舊時花一綫紅潮暈晚霞似說東風送歸後



不將艇子載琵琶

明姿映燭幾回看  
畫曉聲中夜漸闌  
說與何戡也愁絕  
陽關唱後事多般

一重門外遠如天  
笑我心灰冷篆煙  
不是與兒真木石  
尊前多恐見猶憐

空傳二七是良期  
禪榻秋風兩鬢吹  
休問平安舊書記  
怕相逢處又臨岐

徵歌猶憶禊春遲  
賤記空傳主簿詞  
依舊背山臨水地  
不曾中酒已生悲

浪穹災一篇贈龔儀可觀察兼示充齋

六詔浪穹一千山作垣墉帶以三江水貫弗脇與胷一  
門下蒲陀勢若當喉揜縱之入洱海浩浩游羣龍其中  
宅爾宅爾田亦橫縱巖城十萬雉屹然壯雷封今年六  
月雨癡雲冪重重土囊決噫氣推倒雙青峯拉雜走沙  
石橫遏奔流衝尾閭闕斯怒倒射飛矛鏃連卽瓦鱗鱗  
接陌苗茸茸駭波一蕩激埽地無遺蹤可憐巢居人九  
旬斷朝饔司牧者誰子結舌愁告凶潭潭府中居齒肥  
與醉醲使君古循良系出渤海龔乘遠往拯之悲涕紛  
無從遼哉稽天浸一僕撐小脚墟落渺何許孤楊露蓬  
鬆略辨溝洫影熟識鳩鵲形便宜發倉粟寧復計釜鍾

道旁失乳嬰一旦投深禮日募數千指畚鍤屯蟻蜂亟  
排萬石泥快決三年癰乃按戶口籍等差分九農議賑  
及麥秋何止謀禦冬是謂仁者勇上

聞孰敢壅庶幾流亡復比閭得晨春居渙我兩載蒿目  
無歡悰軍興民力竭暫喜停邊烽如何

虞階羽未致蠻邦賓近更簡秋戍驛路來征徂弓刀費  
包鞶糗糈煩輸供相呼飽糠粃來作負擔傭匹諸病疴  
羸豈耐藥石攻何時汜小休歌豳互于喁此非一隅災  
蒼生望顛顛同官有錢子慈諒如魯恭誓將溝中瘠沃  
以春膏濃安得盡公等磊落惟

帝庸救荒猶小補持之贊時雍兵火民則水願言採菲  
對

九目次雲巖先生韻

今年重九遲置閏記夏五閑庭宛東籬露英粲可數一  
尊輒呼醉酒痕上雙輔天知旅吟悲助以滿城雨哀半  
吾久淹非農亦非賈軍中頌一范笑作窮塞主人如冬  
日衰詩比清風甫無窮望京心絮語共童豎忽夢侍秋  
巡射鹿伏而盥

今歲秋猶甫進計此  
時大駕尙駐木蘭

庚寅初度日雲巖先生名飲侑以新詩卽席次元

韻二章奉酬

閨歲霜來早來添髻上花狂歌全爛漫醉墨半欹斜老  
矣非關病歸哉不爲家我辰竟安在把酒一長嗟

香泥團作顆囊繡暈生花

時贈物有香珠佩囊

載錫華棧重長吟

畫燭斜投衣將改歲入幕久同家明日關門道嚴裝辦  
咄嗟

以隅集卷六

已酉端午日  
男秉淵恭校

如隅集卷七

上海 趙文哲 損之

充齋述養各疊前韻成四章見贈翼日復於龔儀  
可觀察寓齋置酒爲祝卽席如數奉酬兼呈雲巖  
先生

瘴鄉身尙在大似耐霜花驟覺西風厲迴看北斗斜老  
寧還仕籍狂輒狎兵家眞作諸侯客應無乞食嗟

澹澹盃如葉明明燭自花漏聲深院靜人影曲欄斜初  
度愁中節長安夢裡家天涯舊相識淪落有同嗟

席間  
偶見

舊人  
故云

二妙詩相敵，牋飛十樣花。  
清歌箏柱促，醉舞帽簷斜。  
吹角秋臨塞，挑燈夜憶家。  
三年共行役，獨抱陟崗嗟。  
曾種金城柳，還占玉節花。  
因公心鄭重，使我涕橫斜。  
暮柝連千巷，秋砧動萬家。  
東山念歸士，相和更咨嗟。

充齋觀察強記過人，每夕枕上必背誦平生所讀書若干篇。雖在軍中，弗輟。近居永昌，聞有隣舍生化之夜，起輒相應和，走筆成二詩贈之。

叩門共識都元敬，連省曾欺顧愷之。  
誰信使君單枕畔，真如學子一燈時。  
偶欣童冠謳吟合，未覺軒虞夢寐遲。  
好語諸生肄歌雅，車前樂職有新詩。

如君豈獨知三篋此地何從借一編忽爾瀾翻餅瀉水  
偶然根觸繭抽絲手無留牘餘冬課腹有遺經忍夜飢  
笑我荒踈愧坡老玉琴音好和隣兒

印  
貽敬齋軍門自京復至永昌感贈次雲巖先生韻

陸辭何切犁庭志尙違自修先息謗不怒藉宣威事已  
殊今昔人誰定是非班荆復窮塞搔首對斜暉

得家書却寄仍用前韻

對客開重掩頻揩老眼花淚乾箋尙漣腕弱字還斜

內子

右手久患風痺近始向愈

瘴地三秋戍饑年廿口家

聞北直今年旱蝗繼以大水



平生鹿門約一悞亦何嗟

碧夢以所獲野鴨見餉賦此謝之

繡鴨本家禽野者性最黠羣居不避人既近尙喧嘶機

心一以動撇波去汨汨城南青華海水比鴨頭滑于茲

逐魚蝦貪賴倍沙獺傍海多民田秉穗恣盜頡

唐書盜頡資糧

可憐弱之肉爲誰養肥腩亦有竹枝弓十乃失七八公

子美且武戎幄弄芳札偶然騁豪興擒賊必擒猾火攻

有神鎗所到崖石砢一奴負而前結束屏帕悚後騎馱

小史山花插雙鬢好暇真翩翩卽此占舍拔水濱足未

到馬上目先察應手發駭機洞中不及噉一絲噴烟碧

中有卜禽鍛歸來數所獲井華付洗刷聶切同披綿知  
我齒搖齧齋厨溢甘香氣味變僧刹旣飽重三歎爾鳴  
聽饒舌爾無摩天翮縱橫掣蒼鵠便宜籬落間雞栖共  
葉枯胡爲性難馴逋淵戀彼茁時復出求食視爾如羈  
楔爾惟不率教是用置大戛不然爾何知飲啄孰與軋  
區區口腹計無罪焉用殺

滇中雜感十二首

有序

予居滇久凡所經歷之地之人之事之物其有  
慨於中者必托諸詩歌以據其閤嘿牢落之感  
顧或迫於行役而不暇以爲或爲而未底于成

時若有宿物著胸膈間比來戍火平安幕府多  
暇輒尋繹遺忘補綴闕略得詩十二章凡二千  
四百八十字竊取樂天秦中東坡鳳翔之義錄  
而存之以俟後之采風於滇者

昆明池

屠維孟陬月始游昆明池周圍三百里雲津浩無涯金  
碧峙左右倒景搖漣漪其源出盤龍自東乃南迤海源  
及寶象森森西注之漚爲稽天浸出沒娥與羲其流入

螳螂下達金沙湄

此金沙江發源吐番牛乳山由滇入蜀達於岷江非萬仞關外由戛鳩蠻

暮入緬甸歸南海之大金沙江也

在昔漢武皇遠略西南夷夜郎索莠

蓄大夏求印枝荒唐圖經外所傳聞異辭妄謂滇海畔  
實利行舟師遂於長安城象滇鑿陞陂荷花擁樓船戈  
甲光參差淵淵戰鼓中時復陳水嬉年深孕靈怪石鯨  
動鱗鬣劫灰流不盡徒作萬古悲豈知南中水作楫空  
爾爲亂石排劒戟大者如卧獲迅湍走其罅如血流四  
支骨節互鉤距宛轉鍼莫施博哉此池利利在萬頃蓄  
障水壩之力節水開以時分流作膏液用沃吾瘡痍龜  
魚萃其窟菱蒲綠其碕博哉此池利餘利尙不貲若以  
肄習流何異置釜鬻鑒彼元狩年學爲少陵詩上以告  
職方藪澤書無遺下以告置吏疏淪求成規從此昆明

池眼中絕旌旗

自元賽典赤講求水利於昆明上流築江華壩以分盤龍塘之水溉田數萬頃

而池之下流曰海口大河潯河數州縣山水皆注於河

河既填淤池水輒泛溢爲田廬患明弘治時巡撫陳金

疏鑿諸灘定有歲修之例

本朝鄂西林相國揔制滇黔時復大加修濬置各河蒞

洩之閘以數十計於是昆明灌溉之利甲於諸郡矣

### 永金

南金貢初錫稽古夏后氏滇居荒服外有金未納甌凌  
遲漢唐餘及明政逾祗勒爲惟正供煌煌出中旨計兩  
至五千役徒數萬指運哀礦亦衰日獲幾黍黍莫云黍  
象微中有蒼生髓

聖清旣平南與民議更始無藝咸蠲除三品式成軌自

從用兵來物貴靡底止黃金僅一銖白以三鎰抵

古以八銖

爲鎰廿四銖爲兩

此非軍所資居奇誰實使諒無郭家穴尙蒙

碩鼠恥先民如可作我思楊伯起竭來博南城白水河

泚泚傳是金所生精鏐他莫比取之自鴨腹其說尤近

詭蜀牛能糞金貪夫自愚耳識氣今有無何處辨沙滓

永金永難求應問長安市

滇金以永平縣所產爲長故稱永金今不易得也

### 蒼山雪

洱海終朝風蒼山太古雪炎炎祝融力不能散凝結我  
經龍尾闕積素羣峯列參差界白雲一色入寥泝初暎  
射倒景半空玉龍掣清光眩不定銀海驟生瀨興夫本

老農土俗能細說南中三白少隔歲偶飄瞥往往不到  
地絕頂皓已潔我思盈尺瑞利在殺螟孽宜麥復宜禾  
于此頌有饒嶄絕十九峯何處耕以鐵六花自游戲不  
救春田裂况聞滇無冰槃鑑無可設金莖遠莫致廣厦  
猶病渴誰將一甌水來餉三伏節紅塵騎如飛石路幾  
蹄折馬上負雪人不及飽糠粃風日自消融無辜撻流  
血滕六實厲階曷不見覓滅

山茶花

蠻語成狂謳蠻花發狂葩問花花無語聽我吟山茶山  
茶滇所獨隨地橫極杙最憶金浪巔

俗所稱可  
密坡也

羣山抱

崑崙離立十萬株虬枝肆騰挐翠陰接如幄風日清且  
嘉一樹千朶花一花千縷霞蒸爲半天赤桑旭搖光華  
無人爲培漑雨露天所加何不如海榴遠載博望槎每  
逢遷謫人攀條重咨嗟我謂花勿嗟爾生樂幽遐深深  
十笏廬曲曲六枳笆不須粉黛貯不用繡幔遮凌冬避  
蜂蜨閱世纏龍蛇夫豈畏霜雪北土非吾家松桂有同  
性恥爲歲寒誇山茶經冬不凋臘尾卽漸開其本有高至四五丈者南陬花市盛  
紅紫紛天斜頗聞芙蓉幕排堦闢豪奢山茶吾語汝勿  
作姚黃花

潞江渡



聲如吼大牛勢如奔怒馬氣如釜沸湯色如土崩赭我  
行逐雞鳴破驛燈已灺瘴雲羃四垂夾岸暗楓檣招招  
一葉舟風中似飄瓦徒侶互牽挽臨流淚頻灑驚波激  
箭馳有柁不能把托命百丈牽去邪許音欲啞溯江幾  
十里脫手乃一瀉旣濟慶更生稍息道旁舍朝曦上銅  
鉦毒霧潰四野徐徐理薄裝獨向征鞍跨尙有負擔民  
信宿枯樹下未持渡江符欲渡津吏罵吁嗟八關路議  
覈及鹽餉用以懲不庭寧許暴殄寡此江走騰衝置吏  
何爲者我非夜獵人呵叱幸寬假莫問司牧誰事紀庚

寅夏

寄生

南維寒暑互二氣疑乃戰女丁勝夫壬非春豔方煽花  
開不序信隨意朱碧炫無樹無寄生厥類無貴賤我思  
物相侮事必由已先去高柯自亭亭特立絕攀援何來  
非種者如椒忽繁衍始知大冶力氤氲日潛扇雀矢遺  
斷粒雁啣落枯蔕偶然著枵杈函活如在喚濕生與化  
生可以觀物變厥初猶維天後遂大蔥蒨雨露本無私  
居高承獨便臭味雨差池謬托女蘿眷依附旣堅牢末  
大形乃見枝葉日凋零惟餘蟲網罥物生必一本毛裏  
性所戀不然入室人利刃或親刺所以歐陽子特著義

兒傳

黔伶

青衫尙天涯蕭條比江潯蠻鄉偶聞樂唳嘶如棘幹昨  
過昆明水授館五華岑頗多賢地主排日聯朋簪妙選  
得小部聲價雙南金周史詫張翰車子誇繁欽一伶擅  
崑曲圓滑如春禽無人來便串獨和朱絲琴曲終猶嫋  
嫋意與芳樽深我本江南客聞之愴難任近前稍致問  
家在黔山陰延陵昔開府飛蓋停花林遲迴三爵後小  
拍歌惜惜曾捐碧玉佩繫之紫羅襟自移隴西節半瑟  
華年侵軍興復旁午舞伴誰相尋有時趁村社恥學爨

弄滛由此久淪落強顏侑清樹爾伶勿終訴且收淚滛  
泔爾歌雖云好未致神聽歆雅樂尙思卧此事匪自今  
夢斷亦莫追毋爲感秋衾勸爾我轉悲非徒歎升沈黔  
伶一曲歌吳儂萬里心不見莊舄病相楚猶越吟不見  
鍾儀囚在晉猶楚音

銀江月

卽銀龍江亦名太平河志  
乘所謂銀江晚釣是也

銀江月晦月傳之自郡志謂爲無稽言否或江有崇去  
夏我從軍有客騰衝至乃云親見之五月日廿四是夜  
天宇晴星緯燦相次攔街人語喧有月萬目視客亦臨  
江橋江流自清駛紛紛白毫光波中忽鱗萃蕩漾旣久

之圓彩爛于燧心知此非月非月無可譬此江在城郭  
見底玉沙被潛祇不能藏何物弄珠媚今春我北還道  
出永平治江邊詢父老娓娓述前事言此不易見見則  
爲上瑞其兆爲銷兵次爲大田利憶昔金川平垂象亦  
此地引領望太平嘉名天所賜我聞月之瑞重輪及抱  
珥不知此何祥存之可無議獨感父老言一洒征夫淚

### 虎頭蘭

滇蘭較閩繁論品遠不逮最下曰虎頭開時溢塵闌奚  
童強解事瓦盎費栽溉位置丈室中晨夕使相對略作  
同心言堇池動淡慨呼童移之郊臨別一尊酌我思水

陸花色香天所配詎以臭味殊視爾等蕭艾惟蘭王者  
香紉作靈均佩蘅杜空自芳幽姿固絕代虎頭爾何癡  
妄擬騷經載蘭形棘乃心孤根托荒穢寧遽同一蕝寔  
已隨衆夢爾從空谷來清芬復何在惡此僞亂真是曰  
閤然態爾歸墟莽間榮名冒毋再縱使當門生有香吾  
忍刈

火把節

亦名星迴節漢元封間樛榆有曼阿娜  
爲漢禪將郭世宗所害併欲得其妻阿

南南約以三事一設幕祭故夫一焚故夫衣易  
新衣一令國人遍知郭以禮娶郭皆如其言于  
六月二十五日聚國人張松幕置火其下阿南  
祭夫畢俟火熾焚故衣遂躍入死焉國人哀之  
每歲于是日燃炬火謂之弔阿南其後唐開元  
間有鄧賧諂者六詔之一也南詔欲併五詔因

星迴節名五詔會飲于松明樓鄧睽詔妻慈善懼難止夫多行不聽乃以鐵釧約夫臂而別比至南詔火其樓諸詔妻尋夫骸不可識獨慈善以鐵釧故得其骸以歸南詔異其慧以幣聘之善以夫未葬爲辭既葬乃櫻城自守南詔以兵圍之三月食盡善盛服端坐餓以死南詔尋悔旌其城曰德源今滇俗六月二十四五日比戶斫松爲燎高丈餘入夜爭先燃之用以照田祈年以炬之明暗卜歲之豐歉戚友會聚別生飲酒夷漢同之亦間有知兩烈婦故事者

六月廿四日金鵝隱西崑維南赤標怒是夕臨朱轡引以絳玉節融風自翩翩燎熏霧四野芬菲騰九闕下乃燭六幽牽連蕩孤魂阿南抗前旌慈善扶後軒玉貌宛無恙雜佩鏘璫璠故衣尙堪著不辨殘燒痕皓腕約單釧應自臨別存城郭已非是何處尋荒電時見烈燄中

閃爍青燐昏却忙聚歌哭血骨盛瓦盆不知漢與唐遺  
事信口論上言阿娜妻次及封德源一如蒼松枝乃以  
松自燔一甘絕粒死至今享芳蕙生米齒賊肉地下含  
煩冤我與赤手剝視此羔與豚照田歲有例婦孺咸趨  
奔寒食弔介子競渡招屈原再拜兩嬋娟惠我禾黍繁  
蘆笙轉悽咽蕭火彌騰掀我亦坐達旦醉來舞蹲蹲作  
詩紀舊俗未肯隨陸渾曰覩民力勤曰勵民風敦

大理石

蒼蒼蒼山雲氣氣入山骨一十九峯間遂作萬玉窟模  
糊發水墨岡巒互出沒遠人及遠樹皴抹細於髮琢之



爲屏風翠影生凹凸往往不脛走位置入華閭明季此  
錫貢不供有重罰可憐千丈坑旦旦填氓卒慷慨蔣中  
丞宗抗疏罷採伐惜未磨崖書刻作遺愛碣方今重本  
計異物却

丹闕白以風有位無俾藉干謁頻年過葉榆此石未停  
捐得非潭潭居癖具米顛笏昔人兼兩書恐被惹珠訐  
鬱林有清操匪石自難拔

魯梅

去冬日南至我從戰場回蕭然騰衝城扶病訪魯梅主  
人久遷徙池館封蛛埃老梅逃小劫獨荷天栽培其本

四五抱盤盤如古槐年深腹空盡蒼皮化爲苔幽香苑  
不歇況有東風催炎陬雪意薄吹作玉出開花開在何  
許濛濛白雲堆獨游愛寂寞時復携芳罍翠禽似留客  
欲去猶裴徊逝將與花別北轅向燕臺豈知一彈指花  
時我重來玉顏定無恙旅客增哀頽年年繫征馬魯梅  
良可哀時將復  
赴騰越

乾溝卽古盤  
蛇谷

雙峽翠相夾沿流一綫斜磴危愁倒馬谷暗駭盤蛇薄  
暮虹懸樹窮冬霧泣花瘴鄉還往數叱馭獨長嗟

騰越城南訪金氏古松十六韻

積翠排山起飛濤入郭聽風光連夾巷霧氣豁雙局愕  
眙翻迴步摩娑試問齡移栽忘世代呵護有神靈屈曲  
通三逕陰森覆一庭雲分橫檻碧雨送過牆青古貌兼  
盤錯高標獨杳冥力能衝瘴癘勢欲闢雷霆密葉朱埃  
隔疎枝素月停蕭涼留鶴夢天矯挾龍形流水聞敲奕  
斜陽遇負苓尊宜傾細細琴可泛泠泠此地烽烟息殘  
年雪霰零後凋知不改餘蔭借初經清絕遺封秩蒼然  
見典型平生棟隆望櫟散寄巒峒

述菴初度日仍用前見贈原韻成四章爲贈兼呈

雲巖先生

初筵誰勸酒半樹玉梅花雪意衝簾薄山容入戶斜青  
衫悲去國白髮話還家暮景飛騰甚相看一歎嗟

吟情空柳絮節物又椒花倚杖雲偏遠添絲日未斜青

書憑驛使圖畫寄漁家

述菴眷屬皆留京邸舊有此久  
三柳漁莊圖予曾爲題句

金錢卜應寬予季嗟

巖屋松飈籟溪樓瀑濺花

連日招要出游城外訪金氏  
古松又過毘盧寺樓觀疊水

河瀑布  
甚奇

人携雙榼小風引一鞭斜到處疑經夢歸時戀

比家真成蠻府客飽食莫吁嗟

刺閨書漸少夜夜數檐花軟語傾杯淺狂歌拓戟斜司

勳還入幕去病詎爲家他日平津閣都成感舊嗟

庭梅試花有作

依然東閣見官梅，冷蕊垂垂照碧苔。  
計日便堪衰鬢插，經年曾傍戰塵開。  
關山寥落誰家笛，風雪淒涼獨夜盃。  
說與花枝也愁絕，天涯扶病客重來。

客夜同述菴碧夢重訪魯梅作

古梅如枯僧，一蒲伏清衆。又如清都僊，紛紜翳白鳳。  
脫身兵燹外，孤逸天所縱。憶昨吾獨游，歲寒盟許共幽娛。  
澹忘言，未敢恣吟諷。相思忽經年，重來挾二仲。匹諸訪  
古歡，有介禮斯重。脫我黃皮袴，卸君紫絲鞵。入門意翛  
然，何處著儻從。撫柯互盤桓，白倒粉姿殘。石骨青有棱。

苔膚碧無縫天根茁冰雪鋤月孰能種踈花僅數點已  
有幽禽咲想見爛漫時一片白雲凍詩慚水部何心比  
廣平未遲遲喚歸鞭愛忍薄寒中空齋酒忽醒永夕竟  
何夢

庚寅除夕碧夢和東坡粲字韻詩見示賦此答之  
一燈花忽圓雙髻雪將半誦君守歲詩動我臨觴歎愁  
隨老俱至人與世相玩閨楊已頻厄社櫟原自散同臨  
戎馬場似遇漁樵伴使令互僮奴招尋雜昏旦苦語口  
脚碑歡笑頭沒案驚看桃符新倦聽爆竹亂國門隔朝  
謁家廟廢薦盟去日何忽忽歸期反緩緩病驥詎受銜

窮魚猶在貫餘生  
吾就衰斯志孰起  
懦成虧任鼓琴輕  
重付懸炭勞歌有  
促節羈迹無定館  
昨惠越酒醇大勝  
燕玉暖

近連致紹興酒甚佳  
醉中泣最多  
試驗枕非粲

檢家書感懷寄內再次前韻

我家五畝宅水竹居其半  
就荒今幾年空抱歸與歎  
昨開君素書淚漉不忍玩  
上言勉加餐下言勤服散  
懷哉卜刀環老作春耘伴  
憶昔入官初息壤傳戒且  
鮎魚一上竿幾至充食案  
可憐筮篲曲力挽中流亂  
君實我諍友何止奉匱盟  
自從謫天涯思君帶趨緩  
况聞懸磬室一錢辭朽貫  
平生氣飛揚念此坐頽懦  
今夕復何夕誰

餉紅籬炭徒吟北門詩尙守西河館終期携手去言就  
茆簷暖若準二歲刑明日免輸粃予以戊子小  
除日抵滇

柬充齋述菴三次前韻

桐音曷以哀其尾焦已半亦如傷心人未語先愴歎三  
年走關塞戈甲若服玩引領望休兵春田快牛散逐臣  
果安求庶趁歌衢伴譬諸無目者永夜亦思旦錢王我  
石交旅食每同案爲民呼號亟謂充齋爲母方寸亂謂述菴

餘事但指口涕淚日忘盥深知時命窮反苦歲月緩炯  
然壯士肝金石尙堪貫此身戰場餘敢逐懦夫懦柳子  
說捕蛇白傳紀賣炭感事良區區尙欲陳史館今時泰



階平願布春臺暖書生輒大言一任三軍衆

寄懷習菴白華耳山四次前韻

昔人貴讀書僅求袁豹半同岑得三友乃有望洋歎我  
老學殖荒空對日景玩槁瘁似左徒踈懶比中散豈能  
挾鉛槧來與老兵伴自顧本薄植斧斤復旦旦公等大  
雅材作吏傍香案同聲奏朱弦洋洋曲將亂神聽和且  
平庸以侑清盟三年吾不見如病失和緩古歡復有幾  
夷險心一貫苦憶臨岐言誦之激頑懦天涯一寸腸日  
夜攪冰炭定知柏葉尊時過藤花館予京寓有古藤一株勉旃問  
字人豈特借餘暖兒子秉淵近受業習菴白華之門織詩致綢繆何夕

見此粲

寄贈余別駕元亭五次前韻

余君澹蕩人乃筦刺史半相逢比護蘇使我釋憂歎俗  
吏今一槩飲博恣酣玩誰當箏笛耳獨彈廣陵散念我  
放逐久班荆日與伴淒淒風雨中鳴雞警清旦軍興近  
十年塵牘積几案藉非廉幹材治絲反使亂惟君冰雪  
腸皎皎明水盥敏則必有功非藉弦戒緩頗聞數月間  
一一就繩貫我衰百無用遇事氣先懦殘年懶殘芋不  
擬煨鳳炭惟有停雲思終朝坐空館宋鵠每遡風燕鴻  
寧就暖勞生分固然莫咏西人粲

烟隱集卷七

巳酉夏至日  
男秉淵恭校